

A tertio verò gradu latitudinis australis Septentrionem versus, per totum mare Arabicum ac Indicum, & Sinum Bengalensem, à Sumatra ad usque litus Africae, alia regnat motio, spirans ab Octobri quidem ad Aprilem è punctis Euro-boreae (*Nord-Ost*) at reliquo semestri, ab Aprile ad Octobrem, è plagis oppositis Zephyro-noti (*Sudwest*) ac Africi (*West-Sudwest*) idque majori cum impetu ac coelo nubilo & pluvioso; cum è diverso Euro-boreae flatus (*Nord-Ost*) sereniores esse soleant &c. quae omnia, cum specialioribus plurimis, enarrari nostrum institutum non deposcit, à nautis verò accuratissimè observari receptum est, ac omnino necessarium ut ad illarum Motionum tempora attendant itineri suo consona, quò vento utantur secundo & profectioe expedita, neve, moras nectendo & elabi tempus suum passi, donec contraria semet ingerat motio, cogantur spem resignare perficiendi itineris propositi, & vel ad portum reverti unde exierant, vel aliorsum interim divertere ad tenendum ibi tempus, donec venti redeant ipsis propitii.

*PHÆN. XIV.* Sunt & alia ventorum ac tempestatum particularia intra Zonas torridas, vel stata vel perpetua, non penitus hinc prætereunda. E. g. (1) Frequens illa *malacia* sub oram Guineae australem, cujus & *Varenius* Prop. XVI. cit. l. & *Hallejus* in relatione sua fusius meminerunt, cum obortis subinde flatibus, quos *Tornados* i. e. in orbem euntes, appellant; Siquidem à latere æquatoris boreali, inter 4. ac 10. gr. lat. ac intra Meridianum Promontorii viridis & Orientaliores Insularum cognominum, tractus maris occurrit ad perpetuam fere malaciam damnatus, quam horrida tonitrua & fulgura comitantur, ac pluviae tam frequentes, ut nautæ Angli eam maris partem abinde *Imbres* (*the Rains*) appellent; subinde verò ventuli sive flatûs incerti subitoque nati interstinguunt, perquam exigui ambitûs & parum durantes, ut singulis ferè horis alius atque alius flet ventus mox in malaciam desinens, quorum ope meliorem viæ partem per illos 6. gr. meridiem versus capere navibus necessum est, haut rarò integros menses ibi detentis ac vix tandem enitentibus. (2) *Ecnephia*, h. e. subitanei & impetuosivi venti ex nubibus erumpentes, inter Brasiliam & Africae procurrentem crebri, Aprili, Majo, & Junio maximè insignes, prope oram Lowango autem Januario, Febuario, Martio, alibique aliis mensibus frequentes. (3) Venti certo anni dierumque tempore in locis maritimis è mediterraneis ad litora versus mare spirantes (quos